

## REGIONAL NEWS

HEADLINES:-

1. Inthlanpui lo awm turah Aizawl district-ah chuan Thawhtanni atangin in lamah vote thlak tan a ni dawn a, Lunglei district-ah chuan vawiin atanga thlaktir tan a ni.
2. Tunhnai a Khawzawl district a thlipui leh ruah sur nasa avanga chhiatna tawkte tanpuina tur pawisa chu vawiin khan pek chhuah tan a ni.
3. Lok Sabha inthlan thawh hnihna chuh tumte tana hming thehluh hun chu vawiin tlai khan a tawp
4. Taiwan lirnghing avanga thi zat chu pakua an tling tawh.

&lt;&gt;&lt;&gt;&lt;&gt;

HOME VOTING

Aizawl District Election Officer leh Lok Sabha inthlana Returning Officer Pi Nazuk Kumar chuan April ni 8, ni 9 leh ni 10 ah te in lama vote thlak bultan a nih tur thu a sawi a, Lunglei district-ah chuan vawiin atangin tan a ni.

He thu hi vawiina Lok Sabha inthlan inbuatsaihna leh ruahmanna hrang hrang chungchanga chanchinbumite nen an inkawmnaah sawiin Pi Nazuk Kumar chuan inthlan hmasaa kum upa leh vohbik ina vote thlak an tih chu chhonzawm leh a ni dawn a ti a. April ni 8, ni 9 leh ni 10 ah te in lama vote thlak bultan tur niin Assembly inthlan hmasaa kum 80 chunglam an tih thin erawh kum 85 ah an thlak tih sawiin tun dinhmuna in lama vote thlak ngai mi 874 an awm a ti a, heng zinga 820 hi kum 85 chunglam an ni a, 54 hi pianphunga rualbanlohte an ni a. April ni 19-a inthlang turin inbuatsaihna peihfel thawkhat tawh a ni a ti bawk.

Aizawl DEO chuan Mizoram bial bik atan General elections observer pakhat, Police Observer leh Expenditure Observer pahnih ruat a ni a ti a. Inthlanna a mawhphurhna nei tur team hrang hrang te chu training pek zawh tawh niin master trainer 24 te'n training an pe a ti a, polling officials Randomisation vawi 3-na chu April ni 17 ah kalpui tura ruahman a ni tih a sawi. DEO chuan SVEEP (Systematic Voters' Education and Electoral Participation) chu vote tla a that theih na'n vote thlak tlemna hmunah a bik taka beihpui thlak tum a ni a, vote tam tak a tlak theih na'n theihtawpa tan lak a ni tih a sawi.

Pi Nazuk Kumar chuan inthlan hriattirna a chhuah ni atanga Model Code of Conduct (MCC) hman tan atanga tun thlengin dan bawhchhia a puha inhekna tun thlengin an la dawng lo niin a sawi bawk.

Hetihlai hian vote thlak tura polling station pan thei lo - kum 85 chung lam (senior citizen), Covid-19 vei mek te leh vohbik (person with disability - PwD)-te tana postal ballot hmanga mahni inchhung luma vote thlak theih dan (home voting) a ruahman angin Lunglei District chhungah vawiin atang khan postal ballot hmangan vote an thlak tan a ni a. Lunglei District chu Lok Sabha 2024 Inthlanpuia Home Voting kalpui hmasa ber District a ni. Vawiinah Zobawk, Rahsi Veng, Rualalung, Buarpui-ah te Home Voting hi kalpui a ni.

Lunglei district-a kum upa leh vohbikte tan in lama vote thlak dilna hi Form 12D hmangan BLO te kaltlangin dawn a ni a. Home Voting dilna hi March ni 25 thleng khan hun hawn a ni a. Hemi hun chhung hian dilna mi 55 hnen atangin a lut a. Dilna lut zawng zawng te uluk takin zirchian an nih hnuah dilnate hi pawm vek a ni.

In lama vote thlak buaipui turin Election Commission of India duh dan angin Polling Official 2, video thlalatuh leh Police awmna team 4 din an ni a, heng team te hian vawiin atangin Lunglei District hmun hrang hrangah Home Voting an kalpui tan a ni.

In chhung luma vote thlak buaipuina-ah hian Block Level Officer (BLO) ten a tul angin ruahmanna an lo siampui zel a, Political Party aiawhte'n an duh chuan vote thlaktu-in a vote thlakna thuruk a vawn theihna chanvo bawhchhe si lovin an lo thlir (observe) phalsak an ni. Video thlalatute pawhin inchhung luma vote thlak kalpui a nih chhung hian uluk takin vote thlaktu-in a vote thlakna thuruk a vawn theihna chanvo bawhchhe si lovin an lo thla an la vek a ni.

## POLL-VOTERS

Election Commission of India chuan April ni 19 zing dar 7 atanga tlai dar 5 chung a Mizoram Lok Sabha bial inthlanpui lo awm turah vote nei zawng zawngte vote thlak vek turin a ngen.

Vote nei si chhan hrang hrang avanga Vote thlak ni a Voter ID Card ken tur nei lote pawhin an nihna tichiangtu (Identification Document) atan sorkar siam card chi hrang hrang hmangin vote an thlak thei dawn a. Chu'ngte chu - Aadhaar Card, ni 100 inhlawhna Job Card (Job Card Holder tan), Bank emaw Post Office Passbook (thlalak chuanna), Ministry of Labour in Health Insurance Smart Card a pekchhuah, Driving License, PAN Card, RGI hnuai NPR Smart Card, Indian Passport, Pension Document (thlalak chuanna), Service Identity Card (Central/State/PSUs/Local body/Private. Company), MPs, MLAs/MLCs ID Card leh Unique Disability ID (UDID) Card te an ni.

<><><>

## CM

Chief Minister leh ZPM Leader Pu Lalduhoma'n NDA emaw INDIA Bloc zawm bik neih an tum lo a ti a, Mizoram tana tha tur ni a langah tu pawh thawhpui thiam thei turin an inbuatsaih tih a sawi.

Pu Lalduhoma chuan ZPM Sawrkarah Lunglei khawpui kawng chu ngaih pawimawh hmasâ-ah an nei dawn a ti a, hnathawh fan theih a nih veleh siam that a ni dawn tih sawiin Lunglei tana hmachhawp lian an neihte chu sawi vek remlo mahse kawngpui hmasawna tur chu ruahmanna thui tak lo kal tawh sa a ni a ti a. Parliament inthlan zawh veleh siam tha turin hna an thawk dawn tih sawiin Mizoram khawpui ber pahnihna a nih angin kawng tinrengah lang chhuak tawh se an duh a ti a. Lunglei khawpui a Cabinet Meeting thutkhawm hmasa ber chu Lunglei High Power Committee, Conference Hall-ah buatsaih a nih tur thu a sawi bawk a ni.

ZPM Leader chuan an Party-in MP candidate atana an vawrhchhuah Pu Richard Vanlalmangaiha chu Mizoram tana hmasawna hnathawhna tur project hrang hrang Delhi tlanga an theluhte chak taka um zui thei tura an rin tawk thu leh, India ram chung mai ni lo, khawvel hmun hrang hranga Mizo awmte pawhin an thlamuanpui theih tur inngahna tlak nia a hriat thu a sawi a. Mizoram MP tha tak a neih theihna turin an party candidate Pu Richard Vanlalmangaiha chu vote theuh turin mipui chu a sawm a ni.

Nizana Vantawng Group YMA Run, Thenzawl Bazar Vengah inkawmhona hun a hmanna-ah Pu Lalduhoma chuan - ZPM chuan sawrkar laipui zawm emaw do emaw an nei dawn lo tih sawi nawnin, a pawng a puia Delhi sorkar an do loh tur thu leh, thlawp theihna leh puihna awm chin zawng zawngah an thlawp tur thu sawiin, ram leh sakhaw tana him lo chinah erawh huaisen takin an dodal dawn niin a sawi a. Tun thla 4 chung sorkarna an kalpui tawhah cheng vaibelchhe engemawzat an hmu tawh tih sawiin, Sawrkar laipuia sorkarna chelhtute pawl zu nih kher emaw lehlam pawl nih kher a tul lova, Central a pawl hnih lian pui pui awm mekah a khawi lamah mah an yang dawn lo a, ram leh sakhaw tana pawl thei an tih dawna dodal thei tura zalen taka awm chu a tha ber ni a an hriat thu a sawi a ni.

<><><>

## RELIEF DISTRIBUTION

Tunhnai a Khawzawl district a thlipui leh ruah sur nasa avanga chhiatna tawkte tanpuina tur pawisa chu vawiin khan pek chhuah tan a ni.

Pathianni leh Thawhtanni a thli leh ruah thawk in Khawzawl District chungah chenna in, Biak in, ran in leh bungraw dang engemawzat a tichhia a. Hriat theih chinah thli leh ruah avanga chhiatna thleng 148 zet a awm a ni. Tanpuina sem chhuah dan tur hi district Bawrhsap Pu K. Lalrohlua hovin Bawrhsap Pisa-a Officer te leh Disaster Management & Rehabilitation (DM&R) Zonal Officer ten vawiin khan an rel a. Vanduaina tawh chungkuate hnenah State Disaster Response Fund (SDRF) inkaihhraina danin a sawi angin tanpuina hi pek chhuah nghal a ni. Khawzawl DC

Office-in tanpuina tur pawisa a neih bak hi Mizoram sawrkar chuan DM&R Department kaltlangin a rawn pek belh dawn tih he hunah hian tarlan a ni.

Pu K. Lalrohluah chuan District chung khaw hrang hranga chhiatna tawk te tan tanpuina pek chhuah nghal char char a ni tawh tih sawiin Bank Account leh Aadhar Card number theh lut tawhte hnenah pek chhuah hmasak a ni tih a tarlang a. Tanpuina la dawng lo te pawh an Aadhar Card leh Bank Account number an theh lut fel hunah tanpuina an pek nghal vat tur thu a sawi bawk a ni.

Tanpuina sumfai pek chhuah bakah hian Zonal Officer te'n an bial chung theuha chhiatna tawk te pualin Silpauline an lo sem chhuak tawh a. Khawzawl Bawrsap chuan thli leh ruahin in chung a tih chhiat sak te rangva mamawh dan la khawmin, sawrkarin a hriattir angin rangva mamawh dan hi sawrkar hnenah thlen a ni tawh tih a tarlang a, rei lo teah rangva te hi sem chhuah theih beisei a ni.

<><><>

#### K. VENA

Rajya Sabha member leh Lok Sabha Mizoram bial inthlan atana MNF candidate Pu K. Vanlalvena chuan Lok Sabha MP atana thlan tlin a nih chuan Mizoram Sawrkar dinglai nen ram hnuk khawihah chuan hruikhat vuana an thawhdun theih tur thu a sawi.

Vawiina Pachhunga University College Students Union hruaitute nen an inkawmnaah Pu K. Vanlalvena chuan zirlai hruaitute zawhna chhangin, India sawrkar hian Myanmar atanga rawn ral tlan zofate hi raltlanah a la pawm lo a. Mizote nena unau an nih tlat avangin MNF Sawrkar kalta khan India Sawrkar thu leh hla dodal in rawn tlan thlate chu hmangaih takin a lo enkawl a ni a ti a. An tana thlamuanna nih ve zel hi a tum thu leh Sawrkar laipui-in a remtilo chung Parliament-ah pawh a auchhuahpui niin a sawi.

NDA-a BJP nena thawhho chungchangah MNF candidate chuan, NDA thawhpui chungin hnam leh sakhaw chungchangah chuan BJP thil tum dodaltu awmchhun a nih thu a sawi a. Lok Sabha atan hian mipui khawngaihna avanga thlantlin a nih chuan he ram leh hnam tan hian a dinna ala pangngai reng a, Mizote sakhua leh hnam paw sawina tur chi chu a do zel dawn tih a sawi bawk a ni.

<><><>

#### CONGRESS CAMPAIGN

MPCC Vice President Pu Lalnunmawia Chuaungo chuan Mizoram, hnam leh sakhua a himna turin Congress Party Candidate vote tlin a ngai a ni a ti.

Vawiina Champhai Press Club-a chanchinbumite a kawmnaah Pu Lalnunmawia Chuaungo chuan India ram chu Ram danpuiin mitin zalenna a pek, Right to Freedom palzutna ram a ni tih sawiin a bikin hnam tenau leh sakhaw tenaute nekchepin an awm zel a, hnam tenaute nekchepna chu RSS-te atanga rawn intan a ni a, chung mite chuan India ram chu Hindu rama siam tumin a rugin, thiam takin hma an la ni ni a puhin tun dinhmunah chuan NDA a thawkho, BJP leh an lamtangte chu an dinhmun a hniam zel niin a sawi. Inthlanpui lo awm leh turah chuan INDIA a intelkhawm, Congress party leh a thawhpui te'n hnehna an chan ngei a beisei thu a tarlang a. Hnam tenau leh sakhaw tenaute tan NDA chu him taw lova ngaiin chu'ng mite dodal tur chuan Lok Sabha Inthlanpui lo awm turah BJP leh a lamtangte Candidate Vote lo tura mipuite sawmin, Mizoram, hnam leh sakhua a him zawkna tur chuan INDIA a tangho zinga mi, Congress Party Candidate Mizo mipuiten an thlan tlin a ngai a ni a ti bawk.

<><><>

#### ELECTION SECOND PHASE

Lok Sabha inthlan thawh hnihna chuh tumte tana hming theh lut hun chu vawiin tlai khan a tawp. Inthlanpui thawh hnihnaah hian state leh Union Territory 12 bakah Outer Manipur nen bial 88 ah inthlan a ni dawn a. Inthlanna turte hi Kerala ah seat 20, Karnatka seat 14, Rajasthan ah seat 13, Uttar Pradesh leh Maharastra-ah seat 8 ve ve, Madhya Pradesh ah seat sarh, Assam leh Bihar ah seat 5 ve ve, West Bengal leh Chhatisgarh ah seat 3 ve ve leh Manipur, Tripura leh jammu and Kashmir-ah seat 1 theuh a ni a. Tun thla ni 26 ah vote thlak a ni ang. Inthlan

chuh tumte lehkha thehluh hi naktukah endik a ni ang a. Jammu and Kashmir bik hi April ni 6 ah endik a ni ang.

<><><>

### TAIWAN

Taiwan lirnghing avanga thi zat chu pakua an tling tawh. Puan tawh angin nimin khan magnitude 7.4 a nain Taiwan khawchhak lam tuipui kamah lir a nghing a. Hualien chhehvel leh an khawpui Taipei-ah te lirnghing hi hriat a ni a. Sawrkar thuneitute sawidanin lirnghing avanga chhiatna thlengah hian mi pakua an thi tawh a, hliam tuar sang khat chuang an awm tawh a ni. Hmun tam takah lei a min a, in chim kara tang mek mi 100 chuang chhanchhuah hna thawh mek a ni a. Heng zingah hian Jinwen leh Qingshui inkar leiverha tang mi 77 an tel a ni.

Lirnghing hi Hualien ah an tuar nasa ber a, kawngpui tam tak chhiat avang leh rel kawng chhia a tam avangin inkalpawhna lamah harsatna an tawk mek a ni.

<><><>

### NATO

NATO chuan Europe leh North America-a an indin kum 75 na vawiin khan an lawm. Brussels-a lawmna inkhawmah US Secretary of State Antony Blinken leh a thawhpui ten hun an hmang a. April ni 4, 1949 khan NATO din tur hian Washington-ah inremna ziah a ni. NATO hruatute hian July ni 9 atanga ni 11 chhungin Washington-ah lawmna hun an hmang leh dawn a ni.

NATO hi a tirah member 12 ten dinin tunah hian a let thumin member hi an pung tawh a.

<><><>